

Il chantun Giura defenda la SSR

Per novitads regionalas e localas da buna funtauna

DA GUIU SOBIELA-CAANITZ

■ **Mintga segund venderdi cumpara a Moutier/BE, bainbaud Moutier/JU, la gasetta d'opiniun «Le Jura Libre»*. Ses schefredactor Pierre-André Comte, anteriur president communal da Vellerat/JU, scriva mintga giada l'editorial ed insaquantas contribuziuns firmadas «PAC».** En l'ediziun dals 12 da schaner fa el endament: «La Conferenza da regenzas da la Svizra dal vest refusa categoricain l'iniziativa 'No-Billag' perquai che lezza è privlusa per novitads professiunalas e per ils interess da las regiuns francofonas, italofonas e rumantschas» (p. 3). En l'ediziun dal 26 da schaner publichescha la gasetta l'appel da la regenza giurassiana a dir «na» a «No-Billag»: «Ses text recumonda d'abolir la taxa da radio e televisiun: Quai muntass la destrucziun dal servetsch public audiovisual en il pajais e la fin da nundumbraivlas staziuns da radio e televisiun (...). Las televisiuns regionalas stuessan svanir. Las novitads regionalas e localas vegnissan pli magras u svanissan» (p. 6). P. 5 citescha «Le Jura Libre» plets da Pascal Crittin, directur dad RTS: «RTS respecta la diversitad chantunala e regionala bler dapli che mo per resguards economics. El ha trais stu-

dios (Moutier, Bienna e Delémont) sin ina distanza da pauc dapli che 40 km ed ina populaziun pli stgarsa che mintg'auer chantun romand. Damaun vegn Moutier sco citad giurassiana a derasar las novitads d'omadus chantuns; quai fa ella gia oz sco citad bernaisa. RTS è in med da massa public, na in med che lavurass tenor reglas mo economicas, sco ch'ils aderents da 'No-Billag' giavischan. El sa sfadia da resguardar l'actualitad da la Svizra romanda en la varietad da sias regiuns grondas u pitschnas» (p. 5).

Moutier astga spetgar

«Le Jura Libre» dals 26 da schaner rapporta era davart il transferiment pendent da Moutier al chantun Giura. Ina lingua grossa tuna: «Préfète priée de faire diligence» («Ins supplichescha la prefecta da far svelto»). Manegiada è la mastrala dal Giura bernais a Courtelary (Vallon de Saint-Imier). L'artitgel di: «Delegaziuns da las regenzas da Berna e dal Giura èn s'entupadas la gievgia, ils 11 da schaner ad Interlaken per pinar las tractativas davart il transferiment da Moutier (...). Lezzas cumenzan cur ch'ins enconuscha il verdict da la prefecta areguard ils recurs anc pendants (...). Las duas delegaziuns vegnan a tractar sin stgalim politic; lur

parsuras èn Charles Julliard (JU) e Pierre Alain Schnegg (BE). Ils incaricads da las duas chanzlias, pia Pierre-Alain Berret (JU) e Stephan Michel (BE), duain metter ad ir preparativas, oravant tut per elavurar il concordat interchantunal che vegnia acceptà da las duas regenzas, lura suttamess als dus parlaments e la finala als suverans dal Giura e da Berna ed a l'assemblea federala. Ins vegn er ad elavurar in plan d'aziun davart il reglament da las tractativas sco er in chalender cun las grondas etappas enfin a la surdada da Moutier. Las duas delegaziuns giavischan la fin da la fasa malsegira d'examen dals recurs inoltrads suenter la votaziun dals 18 da zercladur [a Moutier]; pir lura dastgan las tractativas cumenzar» (p.6). Pertge va lez examen uschè plaun? En ses commentari manegia redactor Alain Charpilloz che la classa politica bernaisa veglia evitar ina nauscha figura cun sia disfatga da Moutier tar las elecziuns chantunalas dal parlament e da la regenza ils 25 da mars. «Les élections closes, on pourra trancher les recours» (p. 1). Dentant astga il pievel da Moutier spetgar. Tgi sa?

* **Adressa: Société coopérative Le Jura Libre, case postale 1026, 2740 Moutier, tel. 032 493 49 44.**